

ՅՈՐԵԼԵԱՆՆԵՐ

ՆԵՐՍԵՀ ԱՐԵՂԱՅ ԱԼՈՅԵԱՆ

ՍՐ. ԹԱՐԳՄԱՆՉԱՅ ՎԱՐԺԱՐԱՆԸ

(Հիմնադրման 90-ամեակի առթիւ)

Որեւէ ազգի կամ ժողովրդի մտաւոր առաջադիմութեան երեք ազդակներն են դպրոցը, տպարանը եւ հրապարակագրութիւնը: Դպրոցը դաստիարակում եւ կրթում է մատաղ սերնդին, տպարանն ապահովում է նրա մտաւոր կեանքի արտադրութիւնը, իսկ հրապարակագրութիւնը՝ ժողովրդի զարգացման մեծագոյն ազդակը: Այս ճշմարտութիւնը շատ վաղուց քաջայայտ է մեզ, եւ դպրոցներն ու տպարաններն իրենց կարեւոր եւ արժանի տեղն են գրաւել հայոց կեանքում, իսկ հրապարակագրութիւնն իր երթն սկսել է միայն 18-րդ դարի վերջերից ու տարածուել յաջորդ դարի առաջին կէսին:

Երուսաղէմի Սրբոց Յակոբեանց Միաբանութեան եւ Պատրիարքութեան բազմաճիւղ առաքելութեան մէջ թէ՛ դպրոցը, թէ՛ տպարանը եւ թէ՛ հրապարակագրութիւնը իրենց կարեւոր դերն ունեն:

Արաբ պատմագիր Զաքի ալ-Դինի վկայութեամբ՝ 7-րդ դարում հայերն արդէն Սուրբ Երկրում ունեցել են դպրոցներ. Երուսաղէմի հայ Պատրիարք Աբրահամ Արքեպիսկոպոսին (638-669) Մուհամմադի տուած հրամանագրով, ի թիւս այլ կալուածքների, Հայ Եկեղեցուն են շնորհուել նաեւ հայկական դպրոցները¹:

1862 թ. նորնախիջեւանցի Կարապետ Շուլտովեանցի նուիրատուութեամբ Սրբոց Յակոբեանց վանքի տարածքում կառուցուել է Երուսաղէմի առաջին օրիորդաց՝ Սրբոց Գայիանեանց վարժարանը, որն ուներ 48 քառակուսի մեթր տարածք: Իսկ արական՝ Մեսրոպեան նախակրթարանը, գտնուում էր Ժառանգաւորաց վարժարանի ճեմարանի ներքնայարկում, նկարչութեան դասընթացների համար նախատեսուած ընդարձակ սրահում: Մաղաքիա Արքեպիսկոպոս Օրմանեանի հաւաստմամբ, մանկապարտէզի մանուկների թիւն էր 100, աղջիկների՝ Գայիանեանց նախակրթարանինը՝ 20, իսկ արական՝ Մեսրոպեան նախակրթարանինը՝ 30:

Մեսրոպեան ու Սրբոց Գայիանեանց վարժարանները գործել են Պատրիարքութեան ֆինանսաւորմամբ՝ թեթեւացնելու համար հայ ընտանիքների նիւթական բեռը²:

1927 թ.-ին Սուրբ Երկրում տեղի ունեցած երկրաշարժի հետեւանքով քանդուել է Սրբոց Գայիանեանց վարժարանի շէնքը: Խարխլուած շէնքի տեղում վանական իշխանութիւնը որոշում է կառուցել Նախակրթարանի եւ Մանկապարտէզի նոր շէնք:

1928 թ.-ին Եղիշէ Ա. Դուրեան Պատրիարքի նախաձեռնութեամբ Սուրբ Աթոռի ծախսերով սկսւում է հոյակապ եւ արդիական նոր վարժարանի՝ Սրբոց Թարգ-

¹ Սաալամեանց Տ., Պատմութիւն Երուսաղէմի, Երուսաղէմ, 2000, էջ 261:

² Տե՛ս Բաղդասարեան Կորիւն Վարդապետ, Երուսաղէմի հայկական թաղամասի գաղտնիքները, Մաս Ա, Երեւան, 2019, էջ 17:

մանչացի կառուցումը: Դժուարին պայմաններում հիմնուած ուսումնական հաստատութիւնն իր հիւրընկալ դռները բացում է 1929 թ.-ին, Մեսրոպ Եպիսկոպոս Նշանեանի վերատեսչութեամբ, մօտ 250 աշակերտներով, մանկապարտէզի շորս, եւ նախակրթարանի շորս դասարաններով:

Բացումից մէկ տարի անց վարժարանի տեսչութիւնը յանձնուած է Կիւրեղ Վարդապետ Իսրայէլեանին, ով այդ շրջանում երիտասարդ վարդապետութեան ամենաաչքառու ուժն էր՝ օժտուած եւրոպական բարձրագոյն կրթութեամբ եւ թրծուած Կալկաթայի, Եգիպտոսի եւ Երուսաղէմի վարժարաններում՝ 15 տարիների տեսչական եւ ուսուցչական փորձառութեամբ:

Այդ օրերին, Սրբոց Թարգմանչաց վարժարանը գտնուած էր կրթական նոր պահանջների առջեւ: Պաղեստինի բրիտանական հոգատարութիւնը կերպարանափոխել էր երկրի կրթական դրութիւնը եւրոպական դաստիարակութեան առաւելութիւններով: Հետեւաբար, որպէսզի Թարգմանչացը կարողանար լաւագոյնս օգտակար լինել իր աշակերտներին, անհրաժեշտ էր հաղորդ լինել այդ նորութիւններին, ու այդպիսով Թարգմանչացի շրջանաւարտ հայորդին առանց ընկրկումի կը կարողանար շարունակել իր ուսումնական ընթացքը օտար բարձրագոյն վարժարաններում:

1932 թ.-ին Սրբոց Թարգմանչաց վարժարանը տալիս է իր շրջանաւարտների առաջին երկսեռ հունձքը, որոնք յաջողութեամբ կարողացան շարունակել իրենց ուսումը Երուսաղէմի օտար երկրորդական վարժարաններում:

Իր գոյութեան ընթացքում վարժարանը տուել է 1600-ից աւելի շրջանաւարտ: Աշակերտների թիւը վայրիվերումներ է ունեցել. 1943 թ.-ի արաբ-իսրայէլեան պատերազմից առաջ Սրբոց Թարգմանչաց վարժարանի աշակերտների թիւը բարձրացել է մինչեւ 750-ի, իսկ 1975 թ.-ին ընդամենը 4 աշակերտ ունէր: Ամենաշատ շրջանաւարտները տուել է 1949 թ.-ին՝ 50 հոգի:

Վարժարանն այժմ ունի 163 աշակերտ:

1953 թ.-ին Սրբոց Թարգմանչաց վարժարանի ուսումնական ծրագիրը նախակրթարանի մակարդակից բարձրացել է Երկրորդական բարձրագոյն ուսումնառութեան: Կրթական այս երեք բաժանումներից բացի, Սրբոց Թարգմանչաց վարժարանն ունեցել է սկսնակական խմբեր: Արիւնների եւ Գայլիկների խմբերը կազմուել են վարժարանի հաստատման առաջին տարիներից ի վեր: Իսկ 1953 թ.-ին կազմուել են նաեւ Արեւուշների եւ Արծուիկների խմբերը: Վարժարանի սենեակներից մէկը յատկացուել է Սրբոց Թարգմանչաց Շրջանաւարտից Միութեանը, որը 1933 թ.-ին կազմուել էր իբրեւ Սանուհեաց Միութիւն, իսկ 1943 թ.-ին ընդունելով երկսեռ անդամագրութիւն՝ կոչուեց Սրբոց Թարգմանչաց Շրջանաւարտից Միութիւն:

Սրբոց Թարգմանչաց Երկրորդական վարժարանի շրջանաւարտները, որոնք տարբեր երկրներում շարունակելով իրենց ուսումը ստացել են բարձրագոյն կրթութիւն, այսօր ճանաչելի են դարձել ոչ միայն Սուրբ Երկրում, այլեւ օտար ափերում, գիտութեան, մշակոյթի ամենատարբեր ոլորտներում: Նրանցից Հայ Երուսաղէմին պատիւ բերող շատ հայորդիներ այսօր բժիշկներ, ճարտարապետներ ու ճարտարագէտներ, առեւտրականներ, գիտնականներ, ուսուցիչներ, երաժիշտներ, հիւպատոսներ, դասախօսներ եւ այլ մասնագէտներ են: Նրանց դասախօսները եղել են եւ՛ հոգեւորականներ, եւ՛ աշխարհականներ, վերջիններիս թուում՝ անուանի երաժիշտ Օհան Դուրեանը:

Վարժարանում տարբեր առիթներով դասախօսութիւններ են կարդացել յայտնի գրաքննադատ Յակոբ Օշականը, երաժշտագէտ Շահան Պէրպէրեանը, բանաստեղծ

Վահան Թեքեյեանը, Եղիշէ Պատրիարք Տէրտէրեանը եւ ուրիշներ:

Այսօր, Սաղիմահայութեան մէջ հայ դպրութիւնը, հայ ազգային բազմադարեան պատմութիւնն ու մշակոյթը դարբնող Սրբոց Թարգմանաչաց վարժարանն ունի ինը տասնամեակների պատկառելի պատմութիւն: Այն իր 90 տարիների հունձքով, կըրթական ծրագրերի եւ ուսուցման պատկառելի ականդութիւն է ստեղծել Երուսաղէմի հայ իրականութեան մէջ եւ շարունակում է մնալ ազգային պանծալի այն հաստատութիւնը, որ կրօնական եւ բարոյական խորքի մէջ հայ պատանիներին թրծում է ազգային շնչով, նրանց մէջ կերտում ազնիւ նկարագիր՝ դարձնելով նրանց բարեկիրթ ու ճշմարիտ հայ:

Պէտք է արձանագրել, որ Երուսաղէմի Առաքելահիմն Սուրբ Աթոռը հիմնել, մըշտապէս սատարել, հովանաւորել, ընթացք է տուել Սաղիմահայ գաղութի միակ երկսեռ ուսումնական հաստատութեան գործունէութեանը: Սրբոց Թարգմանաչաց վարժարանի համար Սրբոց Յակոբեանց միաբանութիւնն անասելի դժուարութիւններ յաղթահարելով կարողացել է եւ շարունակում է պահել, ապահովել վարժարանի կենսագործունէութիւնը: Միաբանութիւնը միշտ ժամանակ է գտել եռանդով ու մեծ նուիրումով իր նպաստը բերելու հայկական Երուսաղէմի կրթական գործի կազմակերպմանն ու առաջընթացին:

Սրբոց Թարգմանաչաց վարժարանը Երուսաղէմի Հայոց Պատրիարքութեան լուսաւորութեան ջահը կազմող կայծերից մէկն է, որի մէջ վառվում եւ բորբոքւում է հայի վեհ նկարագիրն ու հոգին: Այն ոգի եւ կորով է ներշնչում աշակերտների մէջ, ազգային եւ եկեղեցական պատմութեան, լեզուների եւ միւս բոլոր նիւթերի ուսուցմամբ:

Վարժարանի անցած բեղմնաւոր ճանապարհն այսօր էլ մեզ պատգամում է արդիական պահանջների հետ միշտ պահել հայեցի նկարագիրը, տէր ու պաշտպան լինել հայոց ժառանգութեանն ու ուսուցանել մայրենի լեզուն, գիրն ու գրականութիւնը:

